

DOMENIE XXV «VIE PAL AN»

Antifone di jentrade

Jo o soi la salvece dal gno popul, al dîs il Signôr.
In cualsisei tribulazion mi clamaran,
jo ju scoltarai e o sarai il lôr Signôr par simpri.

Colete

Diu, che tu âs fondade dute la tô sante leç
sul amôr par te e pai fradis,
danus la gracie di meti in vore i tiei comandaments
par podê rivâ a la vite eterne.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 55,6-9

I miei pinsîrs no son i vuestris pinsîrs.

Dal libri dal profete Isaie
Cirît il Signôr cuant che si lasse cjatâ,
clamaïtlu cuant che al è dongje.
L'om cence religjon che al bandoni la sô strade
e il trist i siei progetti,
che al torni dal Signôr, che al varà dûl di lui,
e dal nestri Diu, che al è larc tal perdonâ.
Parcè che i miei pinsîrs no son i vuestris pinsîrs,
e lis mês stradis no son lis vuestris stradis,
sentence dal Signôr.
Tant al è alt il cîl sore de tierie,
tant a son altis lis mês stradis sore des vuestris,
e i miei pinsîrs sore dai vuestris pinsîrs.
Peraule di Diu.

SALM RESPONSORIÂL dal Salm 144

R. Il Signôr al sta daprûf di chei che lu clamin.
O vuei benedîti une dì daûr chê altre
e laudâ il to non
in eterni e par simpri.
Il Signôr al è grant e al merte laudât,
e je cence font la sô grandece. **R.**

Il Signôr al è pazient e di boncûr,
pegri tal inrabiâsi e splendit te misericordie.
Al è bon cun ducj il Signôr,
il so afiet al rive sun dutis lis sôs voris. **R.**

Il Signôr al è just in dutis lis sôs stradis,
sant in dutis lis sôs voris.
Il Signôr ur sta daprûf di ducj chei che lu clamin,

di duej chei che lu clamin cun scletece. **R.**

SECONDE LETURE Fil 1,20c-24.27a

Par me Crist al è il gno vivi.

De letare di san Pauli apuestul ai Filipês

Fradis, Crist al sarà glorificât tal gno cuarp, tant che o vivi o che o mueri.

Di fat par me Crist al è il gno vivi e il murî un vuadagn. Parcè che se vivi inte cjar mi bute lavôr, no sai ce sielzi. No ài nancejo une idee. O soi cjapât jenfri chestis dôs robis: o varès gust di lâ e di jessi cul Crist, e e sarès la robe miôr, ma pal vuestri ben al covente di plui continuâ a vivi inte cjar. Compuartaitsi però in maniere degne dal vanzeli di Crist.

Peraule di Diu.

CJANT AL VANZELI cf. At 16,14

R. Aleluia, aleluia.

Vierzinus, Signôr, il nestri cûr

e o rivarin a capî lis peraulis di to Fi.

R. Aleluia.

VANZELI Mt 20,1-16

No isal il to voli che al devente trist parcè che jo o soi bon?

Dal vanzeli seont Matieu

In chê volte, Jesù al disè cheste parabule ai siei dissepui: «Il ream dai cîi al è compagn di un paron di cjase che al saltâ fûr propit a buinore par contratâ lavovents pal so vignâl. Lât dacuardi cui lavovents par un denâr in di, ju mandâ tal so vignâl. Saltât fûr tor lis nûf, al cjatâ altris di lôr che a stavin in place cence fâ nuie. Ur disè: Lait ancje vualtris tal gno vignâl e us darai la pae juste. E chei a lerin. Al tornâ a saltâ fûr tor misdì e lis trê e al fasè compagn. Al saltâ fûr ancje tor lis cinc e int cjatâ altris che a jerin li; ur disè: Parcè mo staiso chi dut il dì cence fâ un coup di nuie? I rispuinderin: Parcè che nissun no nus à contratâts. Ur dîs: Lait ancje vualtris tal gno vignâl.

Sore sere, il paron dal vignâl i dîs al so fatôr: Clame i lavovents e dâur la pae scomençant dai ultins fintremai ai prins.

Si presentarin chei des cinc e a cjaparin un denâr parom. Cuant che si presentarin i prins, a crodevin che ur ves dât di plui, ma a cjaparin ancje lôr un denâr parom. Tal cjapâlu, a bruntularin cuintri dal pari di famee disint: Chei ultins chi a àn lavorât dome un'ore e tu ju âs tratâts compagn di nô, che o vin sopuartât il pês e il cjalt de zornade. Lui i rispuindè a un di lôr: Amì, no soi injust cun te: no âstu contratât cun me par un denâr? Cjape ce che al è to e vatint. O vuei dâi a di chest ultin propit come che ti ài dât a ti; parcè no podaressio disponi de mê robe come che o vuei jo? O no isal pluitost il to voli che al devente trist parcè che jo o soi bon? In cheste maniere i ultins a saran prins e i prins a saran ultins».

Peraule dal Signôr.

Su lis ufiertis

Acete vulintîr, Signôr, i regâi dal to popul,
par che al puedi vê, cui sacraments dal cil,
ce che al professe cu la devozion de fede.

Par Crist nestri Signôr.

Antifone a la comunion Sal 118,4-5

Tu tu âs dât ordin, Signôr, che i tiei decrets a sedin metûts ben in vore.

Che a sedin sigûrs i miei trois
par che o puedi meti in vore i tiei ordins.

O ben: Zn 10,14

Jo o soi il bon pastôr, o cognòs lis mês pioris
e lis mês pioris mi cognossin me, al dîs il Signôr.

Daspò de comunion

Compagne simpri, Signôr, cul to jutori
chei che tu ristoris cui tiei sacraments,
par che o podin sintî i efiets de redenzie
tai misteris e te vite.
Par Crist nestri Signôr.